

Исторические науки

УДК 00152 (575)

**Каримова Мияссар Жамолиддиновна**

тариҳ фанлари номзоди, Ўзбекистон

тариҳи кафедраси катта ўқитувчиси

Тошкент педиатрия тиббиёт институти

**Алимова Мухиба Музофаровна**

Ўзбекистонда демократик жамият қуриш

назарияси ва амалиёти кафедраси катта

ўқитувчиси,

Тошкент педиатрия тиббиёт институти

**Жаббарова Юлдуз Джуманиязовна**

Ўзбекистонда демократик жамият қуриш

назарияси ва амалиёти кафедраси

ўқитувчиси,

Тошкент педиатрия тиббиёт институти

(Ўзбекистон Республикаси Тошкент ш.)

## ТЕМУРИЙЛАР ДАВРИДАГИ ЕР ЭГАЛИГИ

**Аннотация:** Мақолада Соҳибқирон Амир Темур давридаги ер эгалиги муносабатлари темурийлар даврида ҳам давом этганлиги, бу мулк шакллари мамлакат иқтисодини кўтаришда муҳим омил бўлиб хизмат қилганлиги асослаб берилган. Лекин ерларни шахзодалар ўртасида суюрғол қилиб тақсимланиши, давлатнинг сиёсий жараёнларига салбий таъсир қилганлиги, бу Соҳибқирон Амир Темур давлатининг инқирозини темурийлар даврида, кучайишига олиб келганлиги тарихий манбаларга асосланиб ёритиб берилган.

**Калит сўзлар:** Ер эгалиги, ер эгалиги муносабатлари, мулк шакллари, суюргол, Тархон, вакф мулки, давлат ерлари, хусусий ерлар.

**Аннотация:** В статье исследованы формы земельного владения способствовавшие развитию экономики страны в эпоху Темуридов. А также в статье обоснованы основные факторы усиления распада государства Темуридов на основе исторических источников такие, как разделение земель на суюргалы, тарханы между сыновьями темуридов, беками, эмирами оказавшие негативное влияние на политические процессы в стране.

**Ключевые слова:** Землевладение, земельные отношения формы собственности, суюргал (земли которые дарили родственникам и близким Темуридов из государственных земель), тархон (земли которые дарили эмирам, бекам чиновникам дворца), вакуфная собственность (собственность и земли медресе, мечетей, шейхов и.т.д.), государственные земли, частные земли.

**Summary:** The forms of landed property, promoting to development economy of the country, were researched in Temurids' epoch. And also, the article proved the main disintegration factors of Temuridsan the base of historical sources such as; the separation of lands in suyurgals, tarhans between the sons of Temurids beys and emirs that mode negative influence on political processes in the country.

**Key words:** Landed property, landed relation forms of property, suyurgal (lands being given to Temurids' relatives from state property), tarhon (lands being given to emirs, beys, officials of palace), vacuf property (of masques and sheikhs), state property and private landed property.

Темурийлар даврида давлатнинг иқтисодий ҳаётида ер эгалигиасосий ўринни тутган бўлиб, бу даврда ҳам, аввалги давларда бўлганидек, бутун XV аср давомида Мовароуннахр ва Хурросонда ер ва

мулкчиликнинг асосан тўрт шакли: “мулки девоний” - давлат ерлари, “мулкий” –хусусий ерлар, “мулки вақф” - мадраса ва бошқа диний идоралар тасарруфидаги ерлар ва ниҳоят “ жамоа ерлари” бўлган. Дехқончилик ерларининг катта қисми давлат мулки ҳисобланган. Бу ерларга аввалгидек мамлакат ҳукмдори - сulton ёки амирлар эгалик қилган. Темурийлар даврида ҳам давлат ерларини суюргол тарзида инъом қилиш кенг тарқалган.

Суюргол ерлари майдони, шарти ҳамда ер ва ёрлиққа эга бўлган шахсларнинг табақаси жиҳатидан турлича бўлган. Одатда, шахар ёки вилоятлардан тортиб, то алоҳида қишлоққача суюргол шаклида инъом этилган. Бутун бир шаҳар ёки вилоятлар кўпинча ҳукмрон сулола намояндадари ёки йирик ҳарбий ва давлат мансабдорларига берилган. Бундай суюргол ер ва мулклар кўпинча авлоддан-авлодга мерос бўлиб қолган. Суюргол эгасига ўз суюрголи доирасида амалдорлар тайинлаш, солиқлар ва турли тўловларни тўплаш ҳамда айборларни жазолаш ҳукуқи берилган. Шоҳруҳ даврида Хоразм – Шоҳмаликнинг; Фарғона – Мирзо Аҳмаднинг; Тус, Машҳад, Обивард, Нисони ўз ичига олган Хурросон – Бойсунғур Мирзонинг; Қобул, Газна ва Қандаҳор вилоятлари Мирзо Қайду Баҳодирнинг суюрголи эди. Суюргол ёрлиғига эга бўлган вилоят ҳукмдорлари марказий ҳокимиятга фақат номигагина қарам бўлиб, одатда, улар деярли мустақил эди.

Суюргол эгалари тобелигини кучайтириш мақсадида марказий ҳокимият баъзан улар тасарруфига ер майдонларини қисқартирад ёки уларнинг маъмурий ва адлия жиҳатидан ҳақ-ҳукуқларини чеклаб қўяр эди. Суюргол эгаси марказий ҳукуматга бўйсунмаган тақдирда суюргол ҳукуқидан маҳрум бўлар ва ҳокимият унинг вилоятини бошқа шахсга берар эди. Бўйсунмагани учун Шоҳруҳ 1414 йилда Мирзо Искандарни, 1415 йилда эса Мирзо Бойқарони суюрголдан маҳрум қилган.

Темурийлар даврида майдони жиҳатдан майда ва суюргол эгасининг ҳақ-хуқуқи анча-мунча чекланган суюргол ерлари ҳам бўлган. Бундай майда суюргол ерлари, одатда, хизмат кўрсатган кичик мансабдаги ҳарбийлардан тортиб, олий ҳукмдорнинг гвардиясидаги муентазам қўшинларигача берилган. Бобурнинг ёзишича, Султон Ҳусайн Бойқаронинг 14 минглик гвардияси ва 40 минглик муентазам қўшини (гул)нинг ҳар бир аскарига 80 жариб, яъни 40 танобдан ер берилган. Навкарларга берилган бу ерлардан ҳам мутлақо солиқ ва тўловлар олинмаган.

Деҳқончилик майдонларининг бошқа каттагина қисми мулк мақомидаги хусусий ерлардан иборат эди. Шубҳасиз, йирик мулқдорларнинг катта ер майдонлари ҳам, хусусий мулк ерлари қаторига кирган. Мулк ерларининг катта қисми маъмурий, ҳарбий ва диний арбобларнинг тасарруфида бўлган. Масалан, энг йирик мулқдорлардан Хўжа Ахрорнинг 1300 га яқин ер-мулки бор эди. Бу мулкларнинг 300 қўшга тенг бўлган.

Бу даврда ҳукмдор томонидан йирик мулк эгаларига бирон хизмати учун тархонлик ёрлиғи бериш урф бўлган. Тархонлик ёрлигини олган мулқдорлар барча солиқ, тўлоқ ва мажбуриятлардан озод қилинган. Тархонлик ёрлиғи, одатда, амир, бек, сарой амалдорлари, сайидлар ва бошқа юқори табака вакилларига берилган. Бундай ёрлиқни олишга муяссар бўлган мулқдор исмига “тархон” сўзи қўшиб айтилган. Тархонлар кўпчилиги жуда бой бўлган. Масалан, бу даврда Хирот атрофидаги мулклар Дарвешали Тархон, Самарқанд ва Бухоро атрофидаги катта ер майдонлари Абуали Тархон қўлида эди. Бобур Абуали Тархоннинг шоҳона ҳаётини тасвирлар экан, унинг ҳашаматли саройи, хизматида уч минг кишидан иборат хизматкору навкарлари, ўтказган дабдабали тўйтомушалари, берган қимматбаҳо совға-саломлари, халқقا қилган жабрзулмлари тўғрисида ёзади.

Темурийлар ҳукмронлигининг сўнгги даврида Бухоро, Самарқанд, Шахрисабз ва бошқа вилоятларнинг дехқонларидан ҳамда шаҳар ахолисидан йигиладиган давлат даромадларининг анчагина қисми тархонлар қўлида эди. Мовароуннаҳрда улар катта иқтисодий базага эга бўлган. Мамлакатнинг сиёсий ҳаётида ҳам тархонларнинг нуфузли кучли бўлиб, катта сиёсий ҳукуқдан фойдаланаар эдилар. Ҳатто ўзаро низо жанжаллар вақтида тархоннинг қўллаб-қувватлаши бирорта вилоят ҳокимининг тақдирини белгилашда баъзан ҳал қилувчи аҳамиятга эга бўлган.

XV асрда ҳам аввалги даврлардагидек катта ер майдонлари ва суғориш тармоқлари, шунингдек кўплаб дўкон, корхона, обижувоз, бозор, карвонсаройлар, масжид, мадраса, хонақоҳ, мақбара ва мозорларга бириктирилиб, улар мулки вақф деб аталган. Темурийлар даврида ҳам Мовароуннаҳр ва Хурросонда кўплаб масжид, мадраса, хонақоҳ, мақбара ва шифохоналар бино қилиниб, уларнинг барчаси вақф мулкига эга эди. Вақф мулкларидан тушган даромад масжид, мадраса, шифохона ва хонақоҳларнинг таъмири, жиҳози, шунингдек мутавалли, мударрис, табиб ва талабаларга бериладиган нафақалар ҳамда лангархона (мусофирихона) ва шифохоналарнинг кундалик харжлари (озик-овқат, ёқилғи ва ёритқичлари) учун сарф этилган.

Бу даврда дехқончилик ерларининг маълум бир кичикроқ қисми қишлоқ аҳолисининг умумий тасарруфида бўлган. Бундай ерлар қишлоқ тўплари ёки жамоаларининг мулки ҳисобланган. Жамоа ерлари мулкчиликнинг қадимий турларидан бўлиб, улар кўпроқ тоғ олди ноҳияларнинг сувга муҳтоҷ жойларида кенг тарқалган. Бундай жамоа мулкчилиги, одатда, тоғ жилғаларининг суви жамғарилган ёки ер ости сувларини юзага чиқариш учун қишлоқ жамоаларининг кучи билан барпо этилган мاشаққатли ва мураккаб сув иншоотлари – кулфакли ҳовузлар (майда сув омборлари) ва коризлар воситасида ўзлаштирилган ерларда

вужудга келган. Кўпчиликнинг иштироки ва маблағи билан барпо этилган суғориш иншоотлари ва улар воситасида ўзлаштирилган ерлар жамоа мулкига айланган. Мулқчиликнинг бундай тури Темурийлар хукмронлиги даврида унчалик кенг тарқалмаган бўлса-да, ҳар қалай мавжуд эди.

XV асрда Мовароуннахр ва Хурросонда ер эгаларини деҳқон, экин майдонларига ишлов берувчиларни эса музорий (зироатчи) деб юритилган. Зироатчилар қишлоқнинг меҳнаткаш табақасига мансуб бўлиб, улар тўрт гуруҳга бўлинган: 1) давлат ерлари (девон мулки) да яшовчи музорийлар; 2) мулқдорларнинг ерларини ишловчи музорийлар; 3) ўз ерига эга бўлган зироатчилар; 4) вақф мулкларида яшовчи музорийлар.

Музорий давлат ёки вақф ерларида ҳам, тархон ёки суюргол эгалари каби йирик мулқдорларнинг ерларида ҳам ёлланма зироатчи бўлиб, деҳқончилик қилган. Уларнинг ҳосилдан оладиган ҳиссаси ер эгаларининг ердан ташқари, уруғлик, омоч, ҳўқиз, от ва арава кабиларни берганига қараб белгиланган. Қандай ерда деҳқончилик қилишидан қатъий назар музорий ҳамма вақт солиқларни тўлар ва мажбуриятларни ўтар эди.

Деҳқончилик ерларидан олинадиган асосий солиқ ҳирож (ёки мол) деб аталган. Ҳирож, асосан ҳосил етилиб, уни йифиб олиш вақтларида маҳсулот, баъзан пул ҳолида тўланган. Солиқ ҳосилга ва ернинг унумдорлиги ҳамда сув билан таъминланганлигига қараб белгиланган. Жумладан, дарё, булоқ ва кориз сувлари билан суғориладиган обикор ерлардан ҳирож ҳосилнинг учдан бир қисми микдорида олинган.

Агар ҳосилнинг чўғи пастроқ бўлса, ҳирож тўққиздан икки, яъни 22% микдорида тўланган. Лалмикор ерларнинг унумдорлиги обикор ерларга нисбатан паст бўлгани учун, лалмикорлик билан машғул бўлган музорийлар умуний ҳосилнинг олтидан бир, яъни 16,5 % микдорида солиқ тўлаганлар.

Амир Темурнинг баъзи бир ворислари унинг даврида жорий этилган солиқ микдори ва тўлов тартибини бузмасликка, суистеъмолликни

олдини олишга ҳаракат қилғанлар. Тартибга риоя қилмаган айрим маъмурларни жазога тортганлар.

Хулоса қилғанда, Соҳибқирон Амир Темур давридаги ер эгалиги темурийлар даврида ҳам давом этди. Бу мулк шакллари мамлакат иқтисодини кўтаришда муҳим омил бўлиб қолди. Лекин ерларни шахзодалар ўртасида суюргол қилиб тақсимланиши, давлатнинг сиёсий жараёнларига салбий таъсир қилдики, бу Соҳибқирон Амир Темур давлатининг инқирозини темурийлар даврида, кучайишига олиб келди.

### **Фойдаланилган адабиётлар**

1. Темур Тузуклари. “Фофур Ғулом номидаги Адабиёт ва санъат”. - 1996.- б.73.
2. Муҳаммаджонов А. Темур ва темурийлар салтанати. - “Қомуслар бош таҳририяти”. 1996. - б. 68.
3. Муҳаммаджонов А. Кўрсатилган асар. 69- б.
4. Темур Тузуклари. “Фофур Ғулом номидаги Адабиёт ва санъат”. - 1996. - б. 73.
5. Муҳаммаджонов А. Кўрсатилган асар. 70-б.
6. Муҳаммаджонов А. Темур ва темурийлар салтанати. “Қомуслар бош таҳририяти”. - 1996. б. 71.